



REPUBLIKA E SHQIPËRISË  
KËSHILLI I MINISTRAVE

VENDIM

Nr. 748, datë 11.06.2009

PËR

TRAJTIMIN ME PAGË DHE SHTESA MBI PAGË PËR PUNONJËSIT E  
PERSONELIT AKADEMIK NË INSTITUCIONET PUBLIKE TË ARSIMIT TË  
LARTË (1,2,3, 4)

Në mbështetje të nenit 100, të Kushtetutës së Republikës së Shqipërisë dhe të nenit 47 pika 5, të ligjit Nr. 9741, datë 21.05.2007, "Për arsimin e Lartë në Republikën e Shqipërisë", i ndryshuar, të nenit 5/1, të ligjit nr.8487, datë 13.05.1999, "Për kompetencat për caktimin e pagave të punës", të Ligjit nr.10025 datë 27.11.2008 „Për Buxhetin e Shtetit të vitit 2009“, me propozimin e ministrit të Brendshëm dhe ministrit të Financave, Këshilli i Ministrave,

VENDOSI:

1. Struktura dhe nivelet e pagave, sipas kategorive të vendeve të punës, për nëpunësit e institucioneve publike të arsimit të lartë, të jenë sipas Lidhjes nr.1, që i bashkëlidhet këtij vendimi dhe është pjesë përbërëse e tij.
2. Personeli akademik, i punësuar me kohë të plotë në institucionet publike të arsimit të lartë, përfiton shtesë për vjetërsi në punë, në masën 0,5%, për çdo vit pune, por jo më shumë se 15 vjet.
3. Kur një anëtar i personelit akademik, për nevoja të procesit mësimor, punësohet në një vend pune, me kërkesa më të ulëta se kualifikimi që ai ka, do ta përfitojë pagën sipas vendit të punës, dhe një shpërblim prej 50% të diferencës së pages, që do të merrte në përputhje me kualifikimin, me pagën sipas vendit të punës.
4. Kur një anëtar i personelit akademik, për nevoja të procesit mësimor, punësohet në një vend pune me kërkesa më të larta se kualifikimi që ai ka, do të përfitojë pagën sipas kualifikimit të tij/saj.

Në të dyja rastet e sipërpërmendura, këto forma pagesash nuk mund të vazhdojnë më shumë se sa periudha tranzitore, sipas ligjit për arsimin e lartë, për kategorizimin e anëtarëve të personelit akademik, në përputhje me kualifikimin e secilit dhe me kërkesat e çdo vendi pune.

5. Shpërblimi i personelit akademik dhe i anëtarëve të jashtëm ,për pjesëmarrje në **këshillin e administrimit shfuqizohet (3)**, senatin akademik, këshillin e fakultetit, këshillin e profesorëve, kryhet çdo 6 muaj dhe është në masën 8000 (tetë mijë) lekë në muaj, me kusht, që të kenë marrë pjesë në të paktën gjysmën e mbledhjeve të zhvilluara për këtë periudhë dhe jo më shumë se 9 mbledhje në vit. **(2)**

6. Kategorizimi i personelit akademik brenda çdo klase bëhet në përputhje me klasifikimin e vendeve të punës në universitete dhe instiucione të tjera të arsimit të lartë, sipas lidhjes nr.1, që i bashkëlidhet këtij vendimi dhe është pjesë përbërëse e tij.

Kategoritë e pagave për pozicionet e punës me titull të njëjtë përcaktohen në kuadër të miratimit të strukturës dhe të organikës së secilit institucion.

7. Anëtarët e personelit akademik efektivë, që për nevoja të procesit mësimor, japin orë mësimi mbi normën mësimore vjetore, të miratuar me aktet përkatëse, për çdo orë mësimi, te kryer mbi këtë normë, paguhen si më poshtë vijon:

a) Kur janë në kategorinë "Profesor" përfitojnë 1320 (një mijë e treqind e njëzetë) lekë për çdo orë 60 minutëshe:

b) Kur janë në kategorinë "Profesor i asociuar" përfitojnë 1210 (një mijë e dyqind e dhjetë) lekë për çdo orë 60 minutëshe;

c) Kur janë në kategorinë "Docent" përfitojnë 1100 (një mijë e njëqind) lekë për çdo orë 60 minutëshe;

ç) Kur janë "Lektor i parë" përfitojnë 880 (tetëqind e tetëdhjetë) lekë për çdo orë 60 minutëshe;

d) Kur janë "Lektor" përfitojnë 660 (gjashtëqind e gjashtëdhjetë) lekë për çdo orë 60 minutëshe. **(6)**

"Anëtarët e personelit akademik, efektivë e joefektivë, që, për nevoja të procesit mësimor, japin orë mësimi në institucione të arsimit të lartë që e kanë vendndodhjen në qytete të tjera, larg vendbanimit të tyre, për çdo orë mësimi të kryer në këto

institucione, do të përfitojnë dyfishin e pagesave të parashikuara në shkronjat "a", "b", "c", "ç", dhe "d" të kësaj pike, sipas kategorisë që ata kanë." (1)

8. Punonjesit e specialiteteve të ndryshme, të punësuar në institucione të tjera shtetërore me kohë të plotë, por japin mësim në Institucionet Publike të Arsimit të Lartë, si anëtarë të jashtëm të personelit akademik, për çdo orë mësimi 60 minutëshe, të paguhen në të njëjtën masë me punonjësit efektivë, të këtyre institucioneve.

9. Personeli akademik me kontratë, nga kategoria "Akademik" dhe nga kategoria "Profesor", në cilësinë e personaliteteve vendase ose të huaja, të paguhet me honorarë për ditë/orë pjesëmarrje në procesin e mësimdhënies në institucionet publike të arsimit të lartë. Përcaktimi i masës së honorarëve bëhet me vendim të rektoratit, pasi të jetë miratuar më parë në këshillin e administrimit. Masa e pagesës nuk duhet të jetë më e madhe se 5-fishi i pagesës për orët mbi normën, për kategorinë "Profesor". Mënyra dhe kriteret e këtyre pagesave, të specifikohen sipas një udhëzimi të përbashkët të ministrit të Arsimit dhe Shkencës dhe ministrit të Financave.

Efektet financiare që rrjedhin nga zbatimi i këtyre pagesave të përballohen nga të ardhurat e veta të çdo institucioni të arsimit të lartë publik. (2) (3)

10. Funksionarët dhe nëpunësit, që përfshihen në fushën e veprimit të këtij vendimi, nuk përfitojnë shtesa të tjera mbi pagë, të përcaktuara me vendime të tjera të Këshillit të Ministrave.

11. Vendimi nr.1231, datë 02.07.2008, i Këshillit të Ministrave, "Për pagat e punonjësve mbështetës të institucioneve buxhetore dhe të nëpunësve të disa institucioneve buxhetore", nuk do të zbatohet për personelin akademik të institucioneve publike të arsimit të lartë.

12. Efektet financiare që rrjedhin nga zbatimi i këtij vendimi, të përballohen nga fondet e miratuara për universitetet dhe institucionet e tjera të arsimit të lartë, në buxhetin e vitit 2009.

13. Ngarkohen Ministria e financave, Ministria e arsimit dhe e Shkencës dhe institucionet publike të arsimit të lartë për zbatimin e këtij vendimi.

Ky vendim hyn në fuqi pas botimit në Fletoren Zyrtare dhe i shtrin efektet financiare nga data e fillimit të vitit të ri akademik, 2009 – 2010.

**K R Y E M I N I S T R I**

**SALI BERISHA**

Struktura dhe nivelet e pagave për punonjësit e personelit akademik, në institucionet Publike të Arsimit të Lartë (1,2,3, 4)

Nr rendor	Pozicioni	Paga
1	Rektor (Titullar institucioni)	139800
2	Zëvendës rektor, nga kategoria "Profesor"	132200
3	Zëvendësrektor, nga kategoria "Docent" / "Doktor"	130500
4	Dekan nga kategoria "Profesor"	132200
	Dekan nga kategoria "Docent" / "Doktor"	130500
5	Zëvendës dekan, nga kategoria "Profesor"	121000
6	Zëvendës dekan, nga kategoria "Docent" / "doctor"	106700
7	Përgjegjës i njësisë bazë nga kategoria "Profesor"	123800
8	Përgjegjës i njësisë bazë nga kategoria "Docent" / "Doktor"	106700
9	Titullar i grupit mësimor-kërkimor nga kategoria "Profesor"	123800
10	Titullar i grupit mësimor-kërkimor nga kategoria "Docent" / "Doktor"	106700
11	Profesor	121000
12	Profesor i Asociuar	105200
13	Docent (Doktor)	95800
14	Docent (Master)	91800
15	Lektor i Parë/Kërkues i parë	90300
16	Lektor/Kërkues	73400

Vendimet që e kanë ndryshuar vendimin bazë:

1	VKM nr.694, datë 18.8.2010
2	VKM nr.550, datë 11.8.2011
3	VKM nr.507, datë 1.8.2012
4	VKM nr. 268, datë 29.3.2017